

KENYATAAN MEDIA



KEMENTERIAN PERDAGANGAN DALAM NEGERI DAN HAL EHWAL PENGGUNA
No. 13 Persiaran Perdana, Presint 2,
62623 Putrajaya

No. Telefon : 03-8882 5562
No. Fax : 03-8882 5569

PENYELARASAN UNDANG-UNDANG IP DAN UNDANG-UNDANG PERSAINGAN DISELIA OLEH KPDNHEP BERSAMA MYCC

PUTRAJAYA, 25 APRIL 2019 – Suruhanjaya Persaingan Malaysia (MyCC) menghasilkan Garis Panduan Hak Harta Intelekt dan Undang-undang Persaingan bagi menangani kekeliruan, ketidakpastian serta pertindihan perundangan di antara Undang-undang IP dan Undang-undang Persaingan. Kementerian Perdagangan Dalam Negeri dan Hal Ehwal Pengguna (KPDNHEP) dan MyCC akan memastikan perihal undang-undang IP dan Undang-undang Persaingan dikuatkuasakan dengan harmoni dan tuntas di Malaysia.

Undang-undang Harta Intelekt (IP) adalah bermatlamat untuk melindungi dan menggalakkan inovasi kreatif dalam sesuatu industri. Hal ini sekaligus membolehkan Undang-undang IP menyumbang kepada pertumbuhan ekonomi melalui penemuan baru dan pembangunan teknologi yang akan membawa kepada kecekapan ekonomi dan peningkatan produktiviti.

Perkara ini secara tidak langsung melindungi kepentingan pengguna dengan membasmi pengeluaran barangan ciplak yang tidak berkualiti dan boleh membahayakan pengguna. Undang-undang Persaingan adalah bermatlamat untuk melindungi dan mempromosi proses persaingan melalui pencegahan tingkah laku yang membahayakan ekonomi dan pengguna seperti perjanjian anti-persaingan dan penyalahgunaan kedudukan dominan.

Penguatkuasaan Undang-undang IP dan Undang-undang Persaingan secara serentak dalam sesuatu kes boleh mewujudkan konflik perundangan. Sebagai contoh, Undang-undang IP membenarkan perlindungan idea dan inovasi yang secara langsung boleh mewujudkan hak monopoli persendirian. Manakala Undang-undang Persaingan adalah turut bertujuan untuk memecahkan monopoli persendirian yang berbahaya. Walaupun Akta Persaingan Malaysia 2010 (AP 2010) tidak melarang sesuatu perusahaan untuk menjadi dominan dalam pasaran, penguatkuasaan IP yang terlampau ketat boleh menyebabkan sesuatu perusahaan mewujudkan halangan masuk ke sesuatu industri.

-lagi-

Perkara ini kemudiannya akan mengurangkan persaingan lalu membahayakan pengguna. Undang-undang IP turut membenarkan pencipta menaikkan harga jualan sesuatu barang bagi mendapatkan semula kos pelaburan. Sekiranya pencipta merupakan sebuah perusahaan yang berada dalam kedudukan dominan dalam pasaran tersebut, menaikkan harga tanpa justifikasi komersial yang wajar boleh membawa kepada penyalahgunaan kedudukan dominan yang melanggar AP 2010.

Pelaksanaan Undang-undang IP yang terlampau ketat (untuk melindungi hak cipta) boleh memudahkan pelbagai bentuk perlakuan kartel anti-persaingan dilakukan seperti perlesenan silang (*cross licencing*), penggabungan paten (*patent pooling*) untuk menetapkan harga, pembahagian pasaran, keengganan membekal, jualan terikat, diskriminasi harga dan berkelakuan seperti pemangsa.

Sehubungan itu, MyCC menghasilkan Garis Panduan Hak Harta Intelekt dan Undang-undang Persaingan bagi menangani kekeliruan, ketidakpastian serta pertindihan perundangan antara Undang-undang IP dan Undang-undang Persaingan. Garis panduan ini menfokuskan kepada empat perkara penting iaitu:

- i. Risiko perlakuan anti-persaingan yang mungkin boleh berlaku berpunca daripada perlindungan harta intelek;
- ii. Bagaimana Undang-undang Persaingan bertindak balas terhadap isu berkaitan persaingan dan hak cipta dan adakah undang-undang persaingan mampu untuk menyediakan penyelesaian yang mencukupi dan efektif berkaitan isu tersebut;
- iii. Sama ada kelakuan anti-persaingan yang tertentu perlu dikecualikan daripada penguatkuasaan Undang-undang Persaingan; dan
- iv. Bagaimana Suruhanjaya Persaingan berinteraksi dengan pihak berkuasa lain yang mengawalselia perkara berkaitan hak cipta.

Pelancaran garis panduan ini adalah batu loncatan dan manifestasi keprihatinan Kerajaan terhadap melindungi kepentingan peniaga disamping memelihara hak pengguna demi manfaat ekonomi serta negara.

###
